

嘉業堂
叢書

劉賓客文集

第二冊

劉賓客文集卷第九

記下

夔州刺史廳壁記

連州刺史廳壁記

機汲記

洗心亭記

復荆門縣記

武陵北亭記

夔州刺史廳壁記

夔在春秋爲子國楚并爲楚九縣之一秦爲魚復漢爲固陵蜀爲巴東梁爲信州初城於瀼西後周大總管龍門拓王公述登白帝歎曰此奇勢可居遂移府於今治所是歲建德五年隋初楊素以越公領總管又張大之唐興武德二年詔書其以信州爲夔州七年增名都督

府督黔巫一十九郡開元中猶領七州天寶初罷州置郡號雲安至德二年命嗣道王鍊爲太守賜之旌節統硤中五郡軍事乾元初復爲州偃節於有司第以防禦使爲稱尋罷以支郡隸江陵按版圖方輸不足當通邑而今秩與上郡齒特以帶蠻夷故也故相國安陽公乾曜嘗參軍事修圖經言風俗甚備今以郡國更名之所以然著於壁云凡名殊必以國事建必以年謹始也長慶二年五月一日刺史中山劉某記

連州刺史廳壁記

此郡於天文與荊州同星分田壤制與番禺相犬牙觀民風與長沙同祖習故嘗隸三府中而別合乃今最久

而安得人統也按宋高祖世始析郴之桂陽爲小桂郡
後以州統縣更名如今其制宜也郡從嶺州從山而縣
從其郡邑東之望曰順山由順以降無名而相歆者以
萬數回環鬱遶迭高爭秀西北朝拱於九疑城下之浸
曰湟水由湟之外支流而合輪以百數淪漣汨滴擘山
爲渠東南入於海山秀而高靈液滲漉故石鍾乳爲天
下甲歲貢三百銖原鮮而臙卉物柔澤故紵蕉爲三服
貴歲貢十笥林富桂檜土宜陶旂故侯居以壯聞石侔
琅玕水孕金碧故境物以麗聞環峯密林激清儲陰海
風毆溫交戰不勝觸石轉柯化爲涼颼城壓赭岡踞高
負陽土伯噓溼抵堅而散襲山逗谷化爲鮮雲故罕罹

嘔泄之患亟有華皓之齒信荒服之善部而炎裔之涼
墟也永貞元年余始以尙書外郎坐黨累出補茲郡居
無何吏議以是遷也不足庚其責故道貶爲朗州司馬
後十年詔書徵還抵京師俄復前命佩故印綬而南曩
之騎竹馬北向相俟者咸任郡縣巾幘來迎下車之日
私喑且笑旣視事得前二千石名姓於壁端宰臣王峻
倖卿劉晃儒官嚴士元聞人韓泰僉拜焉或久於其治
功利存乎人民或不之厥官翹頤載於歌謠余不佞從
羣公之後肇武德距於今凡五十有七人所舉者四君
子猶振裘之於領袖焉元和十一年七月二十四日刺
史中山劉某記

機汲記

瀕江之俗不飲於鑿而皆飲之流予謫居之明年主人授館於百雉之內江水汙汙周墉間之一旦有工爰來思以技自賈且曰觀今之室廬及江之涯間不容畝顧積塊峙焉而前耳請用機以汲俾矗然之狀莫我遏已予方異其說且命之飭力焉工也儲思環視相面勢而經營之由是比竹以爲畚箕于流中中植數尺之梟輦石以壯其趾如建標焉索綯以爲組縻於標垂上屬數仞之端互空以峻其勢如張弦焉鍛鐵爲器外廉如鼎耳內鍵如樂鼓牝牡相函轉於兩端走於索上且受汲具及泉而修綆下絕盈器而圓軸上引其往有建瓴之

駛其來有推轂之易瓶縉不羸如搏而升枝長瀾出高岸拂林杪踰峻防剗蟠木以承澍貫脩筠以達脈走下潺湲聲寒空中通洞環折唯用所在周除而沃盥以蠲入爨而錡釜以盈飴餽之餘移用於湯沐涑澣之末泄注於圃畦雖漢湧於庭莫尙其需洽也昔予嘗登陴攔然念懸流之莫可遽挹方勉保庸督臧獲齎而挈之至於裂肩龜手然猶家人視水如酒醪之貴今也一任人之智又從而信之機發於冥冥而形於用物浩漭東流赴海爲期幹而遷焉逐我頤指臯之所謂阻且艱者莫能高其高而深其深也觀夫流水之應物植木之善建繩以柔而有立金以剛而無固軸卷而能舒竹圓而能

通合而同功斯所以然也今之工咸盜其古先工之遺法故能成之不能知所以爲成也智盡於一端功止於一名而已噫彼經始者其取諸小過歟

洗心亭記

天下間寺數十輩而吉祥尤章章蹲名山俯大江荆吳雲水交錯如繡始予以不到爲恨今方弭所恨而充所望焉旣周覽讚歎於竹石間最奇處得新亭形焉如巧人畫鰲背上物卽之四顧遠邇細大雜然陳乎前引人目去求瞬不得徵其經始曰僧義然嘯侶爲工卽山求材槃高孕虛萬景全來詞人處之思出常格禪子處之遇境而寂憂人處之百慮永息鳥思猿情繞梁厯榱月

來松閒彫鏤軒墀石列筍簾藤蟠蛟螭修竹萬竿夏含涼颼斯亭之實錄云爾然上人舉如意挹我曰既志之盍名之以行乎遠夫余始以是亭園視無不適始適乎目而方寸爲清故名洗心長慶四年九月二十三日劉某記

復荆門縣記

直故郢北走之道其聚邑曰荆門揭起重關殿於樂都名視縣內之制居殷形束之要故吏師重焉通外民之底貢會南藩之述職故賓禮蕃焉其肇允經營實王孫昌夔居荆以表之命行名建而締構之弗暇無幾何有由勇爵而授赤社於茲者激馳名於省嗇謂相沿爲非

智因請罷去其號發踐吏以董之有司不能端究事本
循空言而可其奏繇是分地征以歸他邑野之人有回
遠之歎廢文吏而顓戍督行之旅有誰何之難是利不
及下也黎民病之自鄢而南斯爲畫疆抵郡之路貫其
七舍持瑞節而銜急宣之使蓋陰相交遂使服縵胡者
備問俗之對執刀匕者申餽牢之禮是敬之不及賓也
君子病之如是幾二十歲距永貞元年江陵尹裴公政
成上游德及於人大建長利俾無遺害乃外濟羣欲內
張全謦周圖經制條白於狀昌言旣從公議攸同忘勞
之徒樂用之工載大其門載高其墉徑術脈分闡閭架
空然後析便地以肥之建具官以司之糜羨財以償其

力役汰冗食以資其秩稍田里不聞於徵令縣官無減
於歲入越某月旣成而落之官修其方人樂其居將迎
犒飫之儀展廢置符繻之事舉戍夫有伍公吏有職由
彙而分率無踰閑入其封者可以知教元和元年四海
會同天子命公師長南宮三年公以介圭入覲途出斯
邑邑人之華皓幼童咸須於道周距躍而謠曰起我堙
廢而完之徠我蕩析而安之昔室於墟風搖雨濡自公
優柔郭閭盈兮昔飲於洿夏涸冬枯自公感通腎涕生
兮淑旂之華兮四牡之駢俟公之還兮觴以祝之卻略
蹠蹠百形一音公爲駐錯衡而勞之有以文從公者紀
事於牘且曰民可懷也蓋命夫學舊史之事以志焉公

不得讓而從之走是以有授簡之辱初公以縣之之便聞於上也禹錫方以郎位貼職於計曹章下之日得以省事逮今以遷人獲宥於善部工休之日得以踐履故於拜命無牢讓於傳信無愧詞以爲古之創物建庸宜於人民而得其時者則必歌其事功爲後代法雅有營謝美召伯也傳稱城沂賢薦敖也賦水泉原隰之狀志慮事命日之規當書而詠之細亦弗可略也是用謹其本始而存乎篇俾後之視今者知楚郊之令典云

武陵北亭記

郡北有短亭繇舊也亭孤其名地藏其勝前此二千石全然見之建言而莫踐去之日率遺恨焉七年冬詔書

以行使符授尙書水曹外郎竇公常曰命爾爲武陵守
莅止三月以碩畫佐元侯平裔夷降渠魁又三月以順
令率蒸民增水坊表火道是歲大穰明年政成農緣畝
以勇勸工執技以思賈因民之餘力乘日之多暇乃顧
其屬曰郊道有候亭示賓以不恩也雖聞茲地韜美未
發豈有待邪自吾之治於斯也購徒庀材大起堙廢未
嘗植私庭礱燕寢役必先公人不余瑕調賦幸均矣城
池幸完矣而重浹辰之役掠苟簡之問卒使勝躅冒沒
猶璞而不攻懼換符之日還復齎恨無乃遺誚於來者
乎言得其宜智愚同贊於是撤故材以移用相便地而
居要去凡木以顯珍茂汰汙池以通淪漣自天而勝者

列於騁望由我而美者生於頤指箕張筵楹股引房櫳
斧斤息響風物異態大道出乎左藩澄湖浸乎前垠仙
舟祖輶繇是區處九月壬午工告休亭長受成赤車威
遲於以落之肅賓而入園視有適沈水北澳陽山南麓
默焉蘧蘧雄殿郊隅前軒舒陽朱檻環之舞衣回旋樂
簾參差北廡延陰外阿旁注芊眠清泚羅入洞戶初筵
修平彫俎靜嘉林風天籟與金奏合亦旣醉止州從事
舉白而言曰室成於私古有發焉矧成於公庸敢無詞
觀乎夢楣有嚴丹牖相宣象公之文律睦然而光也望
之弘深卽之坦夷象公之酒德溫然而達也庭芳萬本
跼萼交映如公之家肥熾而昌也門闢戶闔連機弛張

似公之政經便而通也因高而基因下而池躋其高可以廣吾視泳其清可以濯吾纓俯於遠惟行旅謳吟是采瞰於野惟稼穡艱難是知雲山多狀昏旦異候百壺先韋之餞迎退食私辰之宴嬉觀民風於嘯詠之際展宸戀於天雲之末動合於誼匪唯寫憂公曰夫言之必可書者公言也從事不以私視予余從而讓之是自還也其可乎迺授簡於放臣俾書以示後後之思公者雖灌叢蔓草尙勿翦拜矧翬飛之革然石刻之隱然歟

劉賓客文集卷第九

劉賓客文集卷第十

書

上杜司徒書

獻權舍人書

爲京兆李尹答于襄州第一書

爲京兆李尹答于襄州第二書

答饒州元使君書

答容州竇中丞書

答柳子厚書

與柳子厚書

答道州薛郎中論方書書

與刑部韓侍郎書

答道州薛郎中論書儀書

上杜司徒書

時元和元年

月日故吏守朗州司馬員外置同正員劉某謹齋沐致誠命僕夫持書敢獻於司徒相公閣下昔稱韓非善著書而說難孤憤尤爲激切故司馬子長深悲之爲著於篇顯白其事夫以非之書可謂善言人情使逢時遇合之士觀之固無以異於他書矣而獨深悲之者豈非遭罹世故益感其言之至邪小人受性顓蒙涉道未至末學見淺少年氣粗常謂盡誠可以絕嫌猜徇公可以弭讒慝謂慎獨防微爲近隘謂艱貞用晦爲廢忠芻狗已